



BIBLIOTECA NAZ.

Vittorio Emanuele III

XXV

A

7

NAPOLI

A 7





DECORVM  
ET  
URBANITAS  
MORVM  
JUVENTUTEM VITÆ  
POLITÆ STUDIOSAM  
EXORNANS  
*VIRISQVE HONESTIS,*  
*tam intra quàm extra Principum*  
*aulas plurimum commendans.*

EX  
ASTIOLOGO  
CHRISTIANO  
Pridem Italicè, Gallicè, Latine  
vulgato.



*Cum facultate Superiorum.*

DILINGÆ,  
FORMIS ACADEMICIS  
Apud JOANNEM FEDERL  
M. DC. LXX.



1897

25

PAID

000



1897



## AD LECTOREM.

**D**VO potissimè sunt, quorum gratia Ingenui Parentes, in Acadèmiis, & Christiana litterarum Emporia, suos ablegare liberos insueverunt: Primum, ut Ingenium illi suum ac indolem, quam ab Naturâ rerum pulcherrimarum inopem acceperunt, multivario Scientiarum Thesauro diuitem ac opulentum facere contendant: Alterum, ut Pietatem, quæ cum paucissimis hodie nascitur; & quicquid est ad veræ virtutis decus, id, velut regiam è terrâ gemmam, quan-

te maximo possunt impendio, sibi con-  
quirant: atq; sic demum, post immen-  
sam laborum juxta & pecuniarum pro-  
fusionem, è peregrinis terrarum oris,  
non tam ad suos Eruditi, quàm Boni  
revertant; cambio, ut sic dicam, verè  
illustri, ac nullis unquam Parentibus  
pœnitendo. Sed enim, tanquam sine  
voce statua, vel absque togâ simula-  
crum; sic Virtus, sic Eruditio, nisi  
utrisq; adijcias illud, quo nec gratum  
esse alterutrum, nec decorum potest.  
Quid illud? **MODUS** quidam, &  
velut **Linea**.

Quos ultra citraq; nequit consiste-  
re rectum: Hoc enim ceu instrumento,  
omnem Virtutis actionem moderantes,  
in sua illam Orbita, ac regno contine-  
mus; ne vel ipsa sibi, vel alijs, inter  
quos agimus, molestior possit accidere

ac



ac injucunda : quam proinde normam,  
ac velut cœlestem. Actionis humanæ vir-  
gulam , ubi amiseris , necesse est , ip-  
sam quoq; virtutem , multis licet s. deri-  
bus comparatam , amiseris.

MODUS verò hic ipse , quia a-  
lius esse atq; alius , inter tam dispares  
solet , pulcherrimo nuper artificio , ad  
Bonî communis epitomen est revocatus ;  
è quâ velut amissi , quotquot deinceps  
suas vitæ actiones cum industria metien-  
tur , nihil illi formidare habebunt ve-  
tus illud , quod Musicis quodam ca-  
villo non inepto , opprobrasse unicum  
ferant : Citharæ chordas aptatis, MO-  
RES animi negligitis.

Et prodijt libellus hic , quem vides,  
in Galliâ primum , plenius elegantiarum  
gentis ejus documentis : quas verò , ut  
in nostris quoque provincijs , non tam

imitari possemus, quàm admirari, Vi-  
sum est, prælo typisq, lubentibus iteratò  
subijcere; atq, ita propemodum uti ab  
suo primùm auctore natus; ne nimirum  
id nobis accideret, quod Imperitis sæpe  
Chyrurgis solet, qui vulnus faciunt, dum  
medentur.

Vos, quorum Bono, ac studio sin-  
gulari labor hic consecratur, ita vestram  
annis sequentibus rem instituite, ut in  
vobis ipsi quondam, priscum illud Fabij  
agnoscatis.

Plura moribus, quàm viribus vin-  
cimus.

Nam tametsi laude plenissimus sit;  
Doctrinâ ceteros antecellere; ac lon-  
gè pulcherrimum, Virtutibus antelu-  
cere, est tamen, mihi credite, inter  
duo hæc verè MAGNA.


Majus Opus, MORES compo-  
suisse suos. IN-



## INDEX CAPITVM.

- CAP. I.** **C**ultus Divinus.  
**CAP. II.** **C**ivilis vitæ miscellanea  
institutio.  
**CAP. III.** Congressionum prima offi-  
cia, salutatio, loci cessio, similia.  
**CAP. IV.** Compellendi, monendi, car-  
pendi, salibus utendi forma ac  
ratio.  
**CAP. V.** Vestibus, cultusq; corporis.  
**CAP. VI.** Incessus, sive unus secum, si-  
ve unâ plurium.  
**CAP. VII.** Congressus, ipsa & colloquia.  
**CAP. VIII.** Decorum in Mensa.  
**CAP. IX.** Ministerium Mensæ.  
**CAP. X.** Nocturnus Decubitus,

**Laus Modestiz & Verecundiz in**  
**seqq.**



# ASTIOLOGI CHRISTIANI.

*De Christiana Morum*

## VRBANITATE.

### CAPVT I.

## Cultus Divinus.

### DOCUMENTUM. I.



ST hæc in primis  
Christianæ virtuti  
consentanea cura,  
statim, ut quisque  
somno relaxatur, ac-  
que è lecto consurgit, animum ad  
Deum advertere; eius Numini, actis  
de nocturnâ quiete gratijs,  
mori-

anorigerum in servum offerre sese,  
non tenendæ tantum consuetudinis  
causâ, sed studiosâ & attentâ pie-  
tate.

II. Inter orandum, præsertim  
loco publico, interque non solennis  
Missæ sacrificium, illius dico, quæ  
solemni cantu, & celebritate non  
extrahitur; nec considendum, nec  
ullam in partem gravi corpore est  
incumbendum, nisi quâ fortè im-  
becillitas gravior, aut proclinandi  
corporis, aut sessitandi etiam neces-  
sitatem afferret; quæ si aderit, ta-  
men illa usurpanda erunt modestè  
ac silenter, tum quæ diu tenebit  
res sacra, tum sacratiore curâ, ipso  
jam tempore Consecrationis. Por-  
rò quoties pronis genibus est suppli-

A S

cane

## VRBANITAS.

candum, vtrumque in terram submittendum est,

III. Per Missam solennem, standi, sedendi, in genua cubandi, qui in Ecclesia usus est, is unicuique decori lex esto. In Missa soluta cantu, ac privata, ad solum Evangelium statur, reliquâ omni parte genibus religiosè nitimur,

IV. Vt Templum intratur, illicò silentio, atque aperto capite Deo Optimo Maximo, summum altare versus, reverenter honos habendus est; tum adhibitâ sibi aquâ lultrali, adeunda orationis causa Ara maxima, illâve, ubi sanctissimo Sacramento sedes est, thinc altaria, sacrâve signa cætera,

tera, vt piorum mos, & cuiusque religiosus ardor tulerit.

V. In Templo, oculi ne remerè huc illuc circumagantur, socij ne pulsentur, stringanturve; fabulationibus ne indulgeatur; Preces non sic sonorâ, sic vibranti voce fundantur, ut ab alijs exaudiri possint. Suspiria ne clarè erumpant, compescantur; nihil facere libeat, quod vel offensionem, vel admirationem alijs afferat.

VI. Missæ tempore, Concionis, reliquorum divinorum Officiorum, inambulare in Templo, irreligiosum est. Spatiari autem coram Sanctissimo Sacramento, id verò nullo tempore fas & religio patiuntur.

VII. Ad mensam, cum aut sacris precibus initiatur, aut gratiæ Deo aguntur, recto corpore, manibus quietè compositis est consistendum, nullâ corporis inveniustâ ad-  
miniculatione, nullo oculorum emissitio conjectu. Ad nomen JE SU, ad Doxologiæ Numinis duos illos versus *Gloria Patri*, &, *Sit nomen Domini benedictum*, caput reverenter est submittendum.

VIII. Sacris divinæ scripturæ verbis non abutendum in res profanas aut ludicras.

IX. In Deum, in Sanctos, nec jacienda cognomina, nec dicenda acroamata, seu jocò, seu seriò.

X. Sacris nominibus JE SU, & MARIÆ, vel cum audiuntur tantum,



tum, honorem habento, caput aperiu-  
nto, pedibus ne interstrepun-  
to. in Missa quoties pronunciari ea  
accidit, caput honoris causâ submit-  
tunt. In concione, lectione  
publica, ad primam eorum auditi-  
onem, & quoties qui prælegit, quive  
concionatur, sibi pileum detrahit,  
caput nudant; cæteró qui capitis  
submissione honorem habere satis  
esto. Cùm mensæ assidetur, atq;  
interea dicit aliquis, legitve, satis  
habento nutu capitis honorem te-  
stari. Nam id temporis caput de-  
tegere nulla Urbanitatis lex cogit,  
nisi ut homines inter se colunt, gra-  
vi meritis vel autoritate præcellenti  
cuiuspiam id officij necessariò est tri-  
buendum.

XI. Signo publicè dato ad Salutationem Angelicam, etsi qui circumstant, salutem Virgini non dicunt, dicenda tamen aut positis genibus, aut recto corporis statu, ut aliorum loco illo & tempore exemplum fuerit. Eâ finita, neq; si præsens quispiam tibi antecellit, primum te exurgere, pileumve tibi indere decorum putes; & ubi consurrexeris, mox ijs, qui astant, salutem tempori aptam dicito, faustam ut diem, aut vesperam ijs comprecans.

XII. Cùm inter viaan Sanctissimo Sacramento occurritur, in genua procumbunto adorandi causâ, dum prætervectum sit; Si nihil prohibeat, ad Templum usque deducunt.

cunto. In equo aut in rheda si erunt,  
exiscendunto.

## CAPVT II.

*Civilis vitæ generica, ac miscella-  
nea institutio.*

### DOCUMENTUM I.

**O**Mnis in aliorum conspectu sus-  
cepta actio, specimen animi  
honorificè eos colentis præ se ferat.

II. Foetidarum rerum sensum,  
aut memoriam commovere, inde-  
corum est.

III. Coram alijs serva id atten-  
tè. quoad potes, ne quam ad corporis  
partem manū porrigas, quæ expo-  
sita oculis esse non soleat. Solent  
autem & vultus & manus. Id con-  
fuetu-

suetudine ipsâ ut teneas , assuesce  
huic decoro , etiam cùm solus es.

IV. Quæ res stomachum nau-  
seâ emouent, eas socione common-  
stres.

V. Tecum tute ipse ne canti-  
tes, nisi tam solus sis, nemo ut abs  
te alius audiat. Nec pedum autem  
nec digitorum pulsu tympanotri-  
bam agito.

VI. Nec dentes defrica , nec  
jis stride , nec quicquam aliud ita  
collide, ut horrenti stridore sensum  
molestè alijs laceffat.

VII. Illiberale est , diductis  
brachijs corpus pandere , aut hor-  
sum illorum contorquere.

VIII. Cùm tussis, cùm sternu-  
tas, si regere rem potes, ne magno  
& vi-

& vibranti sono inconditè instrepe.  
Suspiria ne ducas quæ alij sentiant,  
sine gravi causa.

IX. Ne vastè expira, nec ulu-  
la oscitando. Si potes, oscitatio-  
ne penitus abstine, sed tum etiam  
diligentiùs, cùm aut loqueris, aut  
loquentibus præsens es. Habet  
enim id tædij significationem, aut  
parum comis observantiæ in eos,  
quibuscum agitas. Si, quin osci-  
tes, continere te non potes, saltem  
ne loquere interim, nec patulo ore  
hisce, sed pressa illud modestè, seu  
manu objectâ, seu sudariolo, vultu  
ab circumstantium oculis modicè  
averso.

X. Cùm nares emungis, ne  
buccinæ in modum naso persona,  
nec

nec quod elicueris in sudario respecta, nève quod pueri sordide faciunt, mukum digitis tibi aut manicâ deterge, sed in id linteum emundatorio semper utere.

XI. Obdormiscere alijs sermoninantibus, sedere dum stant, inambulare dum immoti manent, loqui dum silendi tempus est vel audiendi, res sunt inurbanæ omnes atque indecoræ. Ei tamen qui cæteris antestat, sunt tempora locaque, quibus in coetu secum inambulare liceat, ut Magistro in schola, alijsq; talibus.

XII. Non decet in cubiculo cubile esse incompositum; non in aliorum oculis aut vestire se aut despoliare; non cubiculo exire semi-  
vesti-

vestitum, aut vittâ pileoq; nocturno redimitum; non ad pluteum; aut omnino in cubiculo stare dissoluto cinctu habituq;e. Actamet-  
 si tibi ad manum domi est, qui lectum sternat, tamen cùm ex eo defilis, ne inconcinnè disiectum & detectum relinquoas.

XIII. Dum studes, si alij tecum vnà student, inurbanum est cuiquam obstrepere, aut sic clarâ voce legere ut interpelles. Est & inscitum ac illiberale, Magistro docente legere alia atque agere, sociosve, quominus attentè audiant, impedire.

XIV. In schola, in concione, alibi, dum audis, ne exultantiùs gestias, sapere ut præ cæteris atque intelligens, non sine aliorum despectu, videaris.

XV.

XV. Ad ludum atq; ad focum,  
diu expectantibus locum non dare,  
indecorum est.

XVI. Cave, ne immodicè ludo incalescas, ne ludum contentionibus aut clamoribus misceas, ne dum calore ardes, interbibas, seu calor è ludo existat, seu ex itineris labore, seu ex opera causave alia. Nam omninò, æstuantem bibere, insalubre ac periculosum est,

XVII. Despuere in focum, manus calefaciendi causâ, proximè ad arduentes prunas admoveere, flammis ingerere, ad ignem, quasi humi sedeas, incurvari, inventum est. Si quid ad ignem coquitur, pedem porro supra ignem ne opandito; honesto in cœtu tergum  
tibi



tibi ne calefacito, neu propius,  
quàm cæteri astant, accedito. Nam  
hoc Vtrumq; prærogativæ excel-  
lentiæ est & autoritatis, Cùm u-  
sus ac necessitas non est, focum mo-  
vere, ligna compulsare, indere,  
demere, ejus est, qui autoritate pol-  
leat, aut cui foci cura commissâ sit.

XVIII. Sedendi lex esto, ut pa-  
tis in terram pedibus, ijsque &  
cruribus æquatis sedeas, non aut  
crus cruri, aut pedem pedi invenu-  
stè superponas.

XIX. Ungues nec subsecandi  
palam, nec verò dentibus sunt de-  
mordendi.

XX. Digni non saliva tingen-  
di, non articulatim distorquendi  
dispendendive, digitis nasus non  
perten-

pertentandus, non converrendus,  
alijs contuentibus.

XXI. In-Caput non quassabis,  
tibias non agitabis, oculos foedè non  
diradiabis; supercilia inæqualiter  
non attolles, os non distorquebis.  
Quos alloqueris, eos cum verbis,  
pytismate atque oris saliva non  
complues. Id ne accidat, nulli te  
in os propiùs offeres, sed iusto ex in-  
tervallo colloquêris.

XXII. Præsente altero, nec pu-  
lices confice, nec sordida id genus  
animalcula. Quòd si sordidum ali-  
quid humi occursans tibi oculos la-  
cessit, quale purulentum sputum,  
talève aliud, id si commodè potes,  
pedum pressu confunde atque obte-  
re. Sin ejus, qui cum agis, vestibus  
adhæret

adhæret oberrâtve, non illi alterive  
 putidè conmonstres, sed quoad po-  
 tes sic tolle concinnè atq; industriè,  
 ut ne sentiat quidem; qui alius au-  
 tem simile aliquid tibi decusserit  
 dempseritve, comem & gratum  
 animum ei ostende.

XXIII. Nec porro procul, quasi  
 jaculo emisso, nec post humeros est  
 excreandum, sed longiusculè & in  
 latus, non ulli qui vna adsit ex ad-  
 verso: ac, si lentior crassiorque est  
 pituita, pede illico, si potes, est op-  
 primenda. De fenestra in subjectam  
 viam ne despuas, ne in focum, ne  
 in malluvium, ad quod os manusq;  
 colluuntur, neque alium in locum,  
 unde lentior ille pede induci atq;  
 aboleri non possit.

XXIV.

XXIV. In congressu cum hominibus, colloquio præsertim, tergum atque humeros eis obvertere, inconditum est. Est & importunū, mensam incurfare, pulpitem succutere ubi aut legit quis aut scribit. Est, ad alterum, tanquam adminiculum, adniti; est cui loquaris, cui loqui velis, vestem ducere; est cubito pulsare, indecorum.

XXV. Noli, ut comptulus videaris, ineptè in omni sermone vitæq; actu strophium aptare tibi, tibialia adducere, reducere, ut bellè quadrent. Ungues ne sordibus oppleti, neu prælongi sunt. Dentium ac manuum munditiam curato, sed sine delicijs ac lautitia.

XXVI. Putidum est inflare genas,

nas, linguam exertare, barbam sibi mulcere, manus confricare, labra distendere aut mordere, pressa arctius aut hiulca circumferre.

XXVII. Ne assentēris, nec verbis ductes. Nam qui alterum phaleratis dictis ducere instituit, is ostendit se despiciatui eum habere, certè minus cordatum ac providum credere, quàm idoneum putat, in quo sic illudat. Quem joci offendunt, ab ejus auribus eos facesse.

XXVIII. Contra decorum est, medio in familiari congressu libros, literas, id genus aliud legere, nisi in re necessaria ac tantisper; ac tum etiam veniam præfa-

ri consentaneum est, nisi fortè  
ceteris, qui tecum sint, authorita-  
te sis superior. Multò ab decoro  
est alienius, aliena scripta, libros,  
res generis ejusdem contrectare,  
applicare se ad ea propius, ocu-  
los in ea defigere, non annuente  
eo, ad quem res pertinet; laudare  
item ea vel carpere, antequam de  
iis sententiam rogèris. Alienissi-  
mum autem, dum qui tibi vici-  
nus est, litteras, talève aliquid  
privatim legit, corporis appulsu  
aut oculorum conjectu, ejus le-  
ctioni imminère.

XXIX. Vultus ne imaginofus  
sit & multiplex, severus, adnira-  
tione suspensus, mœrore obdu-  
ctus, varius & inconstans; nullā  
deniq;

deniq; perturbati animi significationem præ se ferat. Tranquillus sit contrà ac serenus, nec ferijs in rebus nimia hilaritate solutus, nec in familiari & communi vitæ consuetudine, nimia subductus gravitate.

## CAPVT III.

*Congressionum prima officia, salutatio, loci cæpio, familia.*

## DOCUMENTUM I.

**A**bstinendum quidem est immodicæ urbanitatis intemperanti studio, necessariæ tamen in communi vita atq; opportuna morum elegantia diligenter

B 2

ideo

ideo sunt adhibendæ, quòd prætermitti sine eorum injuriâ non possunt, quibuscum vivitur.

II. Spectatos honestosque viros, ut Deo sacratos, ut in civili dignitate locatos, ut istorum similes, capite aperto venerare; pilei, quem honoris causâ tibi exemeris, patulâ interiore parte ad te reductâ. Venerare & non nullo corporis flexu, pro eo ac cujusque dignitas, & ingenuus bene educatorum mos fieri postulat. Ut insulsa autem res est, caput, salutandi causâ, non aperire quibus par est, aut expectare, dum æqualis tuus te hoc officio antevertat, sic, cum non opus est, id usurpare, speciem habet



habet affectatæ urbanitatis. Probrosæ demum inurbanitatis est; respectare an. resaluteris. Porro in salute verbis dicenda, forma illa optima esto, quam politiorum hominum consuetudo præcipuè celebrat.

III. Peccat in rationem decori, qui majori se dicere occupat, ut caput tegat; peccat & qui id non dicit cui æquum est, & qui præproperè caput tegit, præsertim viro gravi colloquens, & qui tegere aliquoties monitus, importunè obsequi detrectat: quare post unam alteramve significationem, capitis tegendi omne jus esto, nisi quid aliud receptum usu uspiam sit. Et qui-

B 3

dem

dem in consuetudine cum æqualibus majoribúſve, qui aut Religioſi ſint aut domeſtici, fas eſt æquali minoríve primum ad ſignum de re iſta obſecundare, ſolent tamen ferè qui vel pares ſunt, vel parvo discrimine ſubjunguntur, vnà omnes caput aperire. Quæ de moderatione hâc annotata, etiam de capiendo loco, & de conſidendo dicta intelliguntur. Nam immodicæ officiorum deliciæ per quàm importunæ ac moleſtæ ſunt.

IV. Qui aut re, aut hominum opinione altero minor, caput operire æquum bonum ducit, dum qui maior eſt nudo interim capite eſſe perſeverat, primum  
hujus

huius rei veniam poscat, tum impetrata utatur; quod sine offensione tamen vtrumq; fiat.

V. Si sedenti tibi intèrvenit quispiam colloquij causâ, assurge adventanti; præcipuè si id personæ ratio exigit, ut si quo nomine tibi antestat, si par, minorve tibi haud admodum est familiaris. Si sedes apud te, si sedile erit, quod quemque decet, ei fac tribuas.

VI. Cùm ijs occurris, quibus te deferre æquum est, præter solitæ consalutationis munus, subsistendum tibi est nonnihil, aut regrediendum etiam, maximè ad januarum ingressum aut locorum angustias, dandusq; eis locus dum præterierint. VII.

VII. Cùm ijsdem si inambulabis, honoratiorem locum eis concedes. Honoratiorem dico, qui ubi deges, talis usu & opinione vulgo habebitur. Generatim; usu receptum videtur apud plures, ut dextera honoris sit index, ita scilicet, ut, quem quis honorat, cum sibi ad dexteram, se ad ejus sinistram astituat. Tres cùm vnà ambulant, qui inter eos est ornatissimus, medio loco accipitur; secundas honoris partes ejus dextera, tertias sinistra sibi vendicat. *At in Gallia cùm ad murum inambulatur, quia muri vicina, & acclivitate superior saepe est, & fere tectior ac mundior, passim mor obtinet, ut digniori illa concedatur,*

*sur, nominatim cum soli duo vnà iter habent.*

VIII. Inter compares aut penè compares tuos, locum ex omnibus commodissimum tibi ne delige. Ad eum invitatus ne pugnaciter resiste. Utere hoc potius modestè & comiter, ut te obsequendi studio, vel contentionibus occurrendi, admittere eum, ostendas; certè de eo gratias agito.

IX. Qui autestate aut dignitate valdè antecel., si domi suæ locove alio prius datum loci minori deferet, ut non convenit eum, qui minor est, tali se honore dignari, ita neque illo superiorem de eo studiosius eum urgere,

B. S. aut

aut plus semel iterumve ei deferre, ne precum magnitudo & crebritas, de prudentiæ vel urbanitatis existimatione, recusanti aliquid detrahat, aut quod non decet, eum facere adigat.

X. At inter æquales, par est domi quemq; familiarem æqualem suum honorificentiore loco impertire; & qui sic accipiatur, cum verò decet recusare primò, innox iteratâ amici petitione, inorem gerere, gratiâque habere.

XI. Domestica in ambulatione similia tenento. Sat erit tamen principio, dignationis causâ, sese ad amici lævam applicuisse; ut fors deinde tulerit, sic

sic eunto. Quæ præceptio nec in ambulatione cum maioribus reprehendi posse videatur, ac ubique locorum; quod plurimò in usu erit, id ratum esto.

XII. Qui cum imperio & potestate sunt, quive magistratum gerunt, ijs omni in congressu loco ceditur. Iidem tamen juvenes si erunt, sciant hoc à se expectari, sibi ut nobilitate pares, at longè ætate provectiores, inprimisque Doctoratûs gradu insignitos, etsi rempublicam non gerant, honore colant; immo delatum ab his ornatiorem locum, primùm eis remittant; tum modestè; cum gratiæ testificatione, quasi tributum ab ijs beneficiû capiant.

XIII. Perhonestum est, quibuscum res & colloquia agitentur, eos vocis testimonio sibi antepondere, illustres præsertim viros & magnâ præ nobis accessione dignitatis; cum quibus nulla unquam est suscipienda contentio.

XIV. Cùm primarius sacrorum Antistes, cùm summus in Republica Princeps, cùm simili dignitatis luce constituti obvijs fuerint, est uniuscujusque benè instituti, pro eo atque ipsorum dignitas fuerit; honorificâ eos consalutatione prosequi, subsistereque etiam, dum præterierint.

XV. Universum hoc cultioris



ris humanitatis genus, in priuinis-  
 que illud quod in sermone ver-  
 fatur, moderare debent, tempus,  
 locus, ætas, personarum dissimi-  
 litudo. Ac serè negotiosi homi-  
 nes prolixis elegantiarum lauti-  
 tijs perungendi non sunt, decur-  
 tandæ illæ, & signo magis quàm  
 verbo exprimendæ.

XVI. Ut opifices, atque in-  
 fimæ plebis homines, sollicitare  
 non debet exquisitæ urbanitatis  
 cura in Patricios ac Magnates,  
 magis id studere eos æquum est,  
 officio illos & obsequio ut co-  
 lant; sic proprium est Nobilita-  
 tis, humanitatem in ipsos facili-  
 tatemque adhibere, fugereque  
 omnem arrogantia culpani ac  
 speciem.

XVII.


XVII. Majorem seu salutes seu viſas, quod ibi locorum his muneribus ſolemne erit, quod perſonarum varietas depoſcet, id uſurpa; ſeu manus illi oſculandæ erunt, ſeu veſtis ora, ſeu dexteræ tuæ libato oſculo ſubmittendum corpus, & conquiniſcendum honoris cauſâ, ut quodque horû, inquam, mos patrius, perſonæ, tempus, locus requirant. Ante rem, ſi quid optimum factu ſit, incertus eris, à conſultis conſilijs expete,

XVIII. Viris gravibus colloquens, corpus tibi ne adminiculato, oculos in eorum ora ne deſigito, propius ne accedito, paſſus circiter unus interjectus eſto,

XIX. Ad

XIX. Ad ægrotum ubi adieris,  
exemplo medicinæ ignarus,  
Medicum ne agito,

XX. Viros existimatione flo-  
rentes, cùm literas ad eos  
dabis, cùm alloquêris, sic com-  
pellabis honoris causâ, ut mos  
patrius atque ipsorum dignitas  
postulat. Scriptas jam literas re-  
lege, ut erratis perpurges, pulve-  
rem, ubi opus erit, insperge; nec  
nisi literis probè desiccatis  
chartam complices,  
ut ne deformen-  
tur.



## CAPUT IV.

*Compellandi, monendi, carpendi,  
salubris utendi forma ac  
ratio.*

## DOCUMENTUM I.

**Q**Uæ ad viros illustres adhibendæ sint honorificæ compellationes, earum, tempora, mores patrij, autores sunt; interpretes autem, viri communis vitæ gnari & experientes. Sed enim quæ in sermone ritè adhiberi coeptæ erunt, dum, cum iisdem sermo habebitur, variè alijs ne commutentur.

II. Non sic splendidæ, sed vulgarioris fortunæ homines cum alloquimur, vulgari quidem

dem ac vernaculâ linguâ (nam Latinæ sua quædam severior majestas atque augustior est) compellamus plurativo numero blandiusculè, Vos, vobis; non Tu, tibi, nisi puerulus fortè sit quicum loquimur, multò nobis ætate inferior, feratque hanc liberio rem compellationem, nobilium ac politiorum loquendi usus. Patrum tamen in liberos certam ad ætatem (ac passim in Gallia usque dum patriâ potestate exierint) sancta hæc autoritas est, Tu, tibi, te, cum illis vernaculè usurpare, sine inurbanitatis nota liberè ut audeant possintq;. Par scholæ Magistris in suos pueriones, par esse videtur autoritas simili

famili jure alijs id genus præsidi-  
bus: Ad intimos & familiares  
quod attinet mos patrius liberio-  
rem illis nonnunquam tutissandi  
inter se potestatem facit, alibi  
sanctius prohibet.

III. Qui in rem, quod potest,  
quod debet, facit; esto, res op-  
tatis tuis non respondeat, tamen  
cum ne carpas: Laudari enim,  
quàm vituperari dignior est.

IV. Moniturus, reprehensu-  
rusve quempiam, circumspecte  
diligenter, clam, palam, isto an  
commodiore alio tempore, im-  
mò & quo genere verborum fi-  
eri id par sit; maximè ubi quis  
aliàs monitus, nec præteritis, nec  
futuris erratis remedium adhi-  
bet.


bet. Ante cætera, seu mones, seu reprehendis, absit iracundia, vocisquæ contentio impotens, contraquæ omnis moderatio animi adsit & placiditas.

V. Enimvero quisquis te admonuerit, quo idcunquæ modo, loco, tempore faciet, amicè & cum gratia accipe. Pòst, si culpa vacabis, ac necessariò tibi purganda videbitur, licebit sanè, ita facias, sed cum hac cura, ut in tempore bonoquæ modo; magis ut rem ei probes, ac de ea molestiam eximas, nominatim si in ejus es cura & potestate, quàm ut te excusatione defendas.

VI. Nulli vitia exprobres, ne naturæ quidem; nec volupta-

ti ducas , verbis factisve quem-  
quam pudore suffundere.

VII. Nec gravi, nec probrosa  
in re , dictis ludito. Si cavillari  
placet, ne morde, ne lacerata ut ca-  
nis. Sales sint in re nati, venusti,  
acuti, nulli odiosi aut acerbi. Fa-  
cetiæ, ne, quod scurræ amant,  
indignis ex rebus, vel inverecun-  
dis actionibus risum quærant.  
Si quid lepidè argutum, si festi-  
vum, dices, risum alijs  
permittens, risum  
contine.





## CAPUT V

*Vestitus, cultusq; corporis.*

## DOCUMENTUM I.

**N**E sis ut foemina comptus,  
 Casariam, capillum, bar-  
 bam, impensius ne cures. Vri-  
 guentis te atque odoribus ne per-  
 fundas. Galerum, neque ad-  
 ductum altius, neque in oculos  
 reductum depressius, nec Thra-  
 sonico fastu compostum geras.

II. Præsentibus alijs, ne li-  
 gulis te astringe, ne relaxa, neu  
 ad requisita naturæ te compara.  
 Naturæ ut servieris, si cibus de-  
 hinc contingendus est, manus  
 elava, at si fieri potest, alijs haud  
 præsentibus.

III. Sani-

III. Sanitatis vñâ & mundi-  
tiæ interest, manè lecto solutum  
faciem manusque abluere; tum  
in tempore caput pectere, dum  
ne curiosius, & ad delicias id fiat.

IV. Non sint sordidæ, laceræ,  
pulverulentæ, depilatæ velles.  
Semel ferè in dies singulos, sco-  
pulis depurgantor. Quin ubi se-  
deas, ubi in genua procumbas,  
quò corpus applies, videto; ne  
aut puluere aut qua aliâ immun-  
ditiâ locus horreat. Pallium sub  
alas, basilicam ad pompam, ne  
substringito. Seu togam autem,  
seu pallium tibi eximes, compli-  
cato ea decenter & compositè,  
atque ubi deponas, etiam adver-  
tito.

V. Ge-

V. Genus vestium id ama, quod tui compares honesti modestique usurpant, habita prudenter locorum temporumque ratione. Enim verò id hîc etiam age atque opta, inter æquales tibi, ut vestium cultus simplicior ac modestior sit potius, quàm aut opulentus magis aut apparatus.

## CAPVT VI.

*Incessus, siue unus secum, siue  
anâ plurium.*

## DOCUMENTUM I.

**F**Ac cùm incedis, gressu eas nec concito effusè, nec languidè inertì, non ore diducto;  
NON

non promicanti, non datatim  
nutanti corpore, non pendu-  
lis manibus, non ja&atis succuf-  
fis&ue brachijs; non pedum  
plantis terram validè compul-  
santibus, non variè imissis, non  
valdè projectis pedibus, non ter-  
ram converrentibus. Sunt &  
hujus decori partes; tibialia pas-  
sim in incessu haud adducere,  
non summis niti pedum articu-  
lis, non subsultim tolutimve, ut  
in chorea; non corpore incur-  
vo, non prono capite, non saltu-  
atim, non calcaneis sese incur-  
santibus ingredi, non extra tem-  
plum capite aperto progredi, ni-  
si si religio id jubet; ut cum san-  
ctissimum Sacramentum foràs  
per viam est prosequendum.

II. Ne pavi instar magnificè  
 te circumspice, pulchrè an  
 comptus sis, calceatus commo-  
 dè, tibialia recentè sive aliæ vestes  
 benè an corpori sedeant. Pedem  
 è cubiculo ne effer, scriptorio ca-  
 lamo aut ori indito, aut auriculæ  
 imposito. Omitte & flores, ta-  
 lè sive amœnitatum delicias, auri-  
 bus, pileo, galero præfixas cir-  
 cumferre. Sudamolum ne manu  
 præfero, nec pendulum ex ore,  
 è zona, sub axillam congestum,  
 in humeros immissum, sub toga  
 abditum: loco illud habeto, unde  
 nec aspectabile sit, & præstò ex-  
 promi possit, ubi usus erit. Idem  
 nisi mundum, & propè adhuc  
 intactum abs te, alteri ne offeras.

C

III. Seu

III. Seu solus seu comitantibus alijs, per vias esitando ne incedas, præcipuè in civitatis luce publica. Ne domi quidem, alieno tempore comedere, præsertim coram alienis hominibus.

IV. Solus tecum ne ride, ne colloquere. Non sunt enim hæc sapientis. Nec solus per viam cantu te exhilara, unde alij rem percipiant. Non te efferas mirantis specie, tanquam magnū aliquid animo volutes. In via, ligna, lapides, res, reclusæve id genus alias, ut in silia ne jactes. De industriâ, saxa pedibus ne collidito, ne emoveto. Stultorum enim negotia sunt ista. Non te inferas capite arduo, non depresso.

se abieciùs, non contorto ineptè aut in dexteram, aut in lævam; non oculis huc illucque hianti-  
bus.

V. Inprimis si honori tuo consultum vis, cum bonis ambula. Si id non potes, quia aut non nosti, aut quâ aliâ de causâ, solum te esse atque ire, quàm cum malis, est optatius.

VI. Si cum æquali tuo gradieris, in eum principatum tibi ne arroges; ne ambitiosæ antecessi-  
onis delicias secteris, neu, si locus tibi pro dignitate delatus non erit, indolescas. Sin dignior est comes, dextrum tibi eum, certè honoratissimo loco statue; ac, dum vnâ itis, cave gradu eum prævertas.

VII. Domo si solo comite-  
uno spatiaberis, atque is erit, cui  
honorem debeas, eum primo  
ambulationis ingressu ad dexte-  
ram colloca; nisi cum substite-  
rit, ne intersiste; prior ambula-  
tionem ne converte; ipsa in con-  
versione vultum non humeros  
ad eum adverte. Si celsâ erit &  
illustri dignitate, gradum cum  
eo penitus ne æquato; tantillum  
reductus eum prosequere, sic ta-  
men dimensè ac modicè, tecum  
ut commodè sermonem confe-  
rat. Si compartibi est, ambula-  
tionis spacia pari cum eo nutu  
dimetire; prior ne semper te  
converte; ne in medio incessu  
crebrò interiunge, nisi cum illu-  
stris



stris necessitas rem excusabit.  
 Res enim ista & principatum  
 præ se fert, & molestiam creat.  
 Qui inter stipantes medius am-  
 bulat, si fortunâ & dignitate pa-  
 res utrinque sunt aut penè pares,  
 alternis ambulationem conver-  
 tat, hinc ad dexteram, indè ad  
 sinistram; sin dispares sunt, di-  
 gniolem versus sese, plurimùm  
 convertat. Denique qui eum  
 cingunt, semper ad eum, & cum  
 eo, non antè aut pòst, se conver-  
 tant; quippe ipse ambula-  
 tionis metator  
 est.



C ;

CA.

## CAPVT VII.

*Congressus ipsi & Colloquia.*

## DOCUMENTUM. I.

**I**N hominum doctorum graviumque congressu, levicula in sermonem ne inducito; nec apud indoctos subtiliora, quam ut intelligant, aut quæ difficulter inveniant. Sententias crebrò ne eloquere, præsertim apud æquales, minimeque apud eos, qui dignitate antecellunt; nec temporibus item vel auditoribus aliena. Inter epulas, festæve tempora, tristia ne commemorato; non dirlitates plagarum, non immunditiarum spurcicias, non mortis rædia: quin, si de his sermo aliun-

de

de inductus erit, tu, si potes, industriè commutato. Somnia, nisi intimis familiaribus, ne referto, ea quæ tùm, cùm illustrem rerum significationem dare videbuntur, cui fidem tamen ne habeto.

II. Non est hominis bene instituti, de rebus suis gestis, de ingenio, virtute, cæteris ejusmodi laudum nominibus gloriari, quin imò de sua aut suorum nobilitate, divitijs, honoribus, nisi coactus non loquetur. Idem se, haud temerè, in sermone admodum deprimet.

III. Ubi risui locus non est ibi cavillari, & joculari velle importunum est. Ne rideas effuse,

nec indecorè, nec sine idonea causa, tantùmve ideo, more tuo ut rideas. Ex aliena calamitate risum ne captes, etsi risui per se opportuna esse videatur.

IV. Neminem injuriosè appelles, neque joculari neque extra jocum. Neminem verbis perstringas, neminem ludifies, hominum præsertim antecellentium, tametsi ab eo causam acceperis.

V. Ne sis morosus & difficilis, sed comis & liberaliter officiosus, priorque alijs salutem dicere occupa. Sermonem accipe & redde; nec te conde in recessum, cùm in vitâ communi humanè congregari & colloqui oportet.

VI. De

VI. De nullo, de nullius rebus, ullâ ratione detrahe. Etiam cùm laudas, modum tene.

VII. Colloquijs, consilijsve ne te immisceas, quibus gratûsne intervenias, tibi incertum sit. De rebus, si autoritate princeps non es, sententiam, nisi rogatus, ne dicito, præsertim non in tempore, neque utilitatis spe allucente. Rogatus, sermonem confer in pauca, matureque ad rei caput accede.

VIII. Si qui ullâ de re duo contendunt, nèutri, nisi quid coget, accedito. Quod sentis, ne pertinaciter defende. In rebus, quæ ad sentiendum liberæ sunt, quæ pars sententiarum numer o est superior, eam complectere.

IX. alien-

IX. Alienis culpis cenforem te & reprehensorem ne appone. Est enim id Magistrorum, Patrum eorū qui præsunt, proprium munus. Potes tamen alienum præ te ferre. Potes interdum, prudenti ratione, opportuna in rem monita delinquentibus adhibere.

X. Aliorum labes ac maculas, tametsi naturâ insint, maxime si in facie insident, curiosè ne despicias, neu causas scitèris, unde extiterint. Quod in aurem amico fidenter dicturus esses, præsentibus alijs silentio preme.

XI. Quæ lingua tibi ignota est, aut non probè percepta, eâ ne fermocinèris, nisi in re necessaria,

## VITA COMMVNIS. 52

faria, ut animi tui fenſa intelligentiùs exprimas. Patrio ac gentili idiomate utere; non inconditè ut fax populi, aut ut ancillare abjectum genus, ſed ut politiones atque optimates cives tui & cultè & eleganter. Inprimis caſtè loquere ac verecundè, ſubturpicula ipſa, nec clam alteri in aurem, nec liberiùs quaſi perluſum verniliter funditans. In ſermone de rebus altis & ſublimibus, fac vilia & plebeja verba tibi ne excidant.

XII. Ne eloquere, niſi re priùs cum animo tuo cogitatâ expenſaque, quotidiano in ſermone verborum circuitione ne utere, argutias & emblemata ne  
C 6 quære.

quare. Voluente aut lapsante  
linguâ verba ne involve; contrâ,  
ne loqueretam lentè & cunctan-  
ter, ut fastidium crees.

XIII. Dum quis alius loqui-  
tur, cave auditores tuâ causâ ab  
eo defluant; tu audi facilis & at-  
tentus, non oculos aliò intor-  
quens, non aliud agens. Si du-  
ctim quispiam & quasi restitans  
loquitur, tamen ei, velut lo-  
quēti subserviens, verba ne sup-  
ple, nisi hoc te roget, aut priva-  
tim res agatur, sitque ipse de in-  
timis tuis & perfamiliaribus, ne-  
que interpella autem, neque ei  
responde, quoad loquendi ipse  
finem fecerit.

XIV. Dum colloquio inter-  
venis



venis, ne percontare, ecqua de re sermo inductus sit ; habet enim id specimen auctoritatis. Precare potius urbanè & comiter, ut qui cœptus erat, eum, qui habebant, pertendere ne graventur, si ideo conticuisse eos senties, quia tibi deferunt. Contrà, si quis colloquenti tibi intervenit, præsertim vir spectatus & gravis, est è rationibus decori, sermonem habitum compendio referre ; deincepsque totum pertexere atque exequi.

XV. Nihil ore, oculis, manibus faciendum indecorè, quò, res quæ dicitur, exprimatur. Nec verò tenenda brachia sunt aut in tergum reducta, aut complica-

plicata decussatave. Inest enim in his corporis gestibus plus quiddam authoritatis. Sed sustinenda ea ratione modoque, ut manus, altera alteri adjecta, coram adversæ sint, paulò infra pedus, aut ad zonam deductæ. Zona ipsa nec prælarga, nec præarcta sit; depressa immodicè aut surrecta. Inter verba, etiam adverte quàm compositè corpus moveas. Quo in genere nec caput motes, nec manibus mices, & firmo in vestigio consiste.

XVI. Sic habeto, inconcinnum esse, inter loquendum pileum ori aliudve quicquam prætere; chartam aut quæcumque alia mansitare, capite mica-

re, cubitos collidere unum in pedum collocare sese, tibiæ alteram alteri transversam inducere.

XVII. Eum, de quo loqueris, digito ne monstra; ad ejus autẽ, quicum loqueris, ne vultum, quem vereri inprimis addecet, nec personam propiùs accede.

XVIII. Duobus unà pluribusve inter se fermocinantibus si quem seorsum conventum velis, paucis rem expedi; nec quod dicere habes, in aurem ei dicit; sed, si arcana res erit, seduc eum ab alijs paululum. Si potes nihilque prohibet, colloquere idiomate, quod qui circumstant, probè noverint.

XIX. In

XIX. In multorum communi congressu, privatim ne uni atque arcanè colloquitor; verum de re hujusmodi differ cum in tempus alterum, nisi tu fortè cæteris præsides.

XX. Intempestivè velle adire & colloqui, perinde est, atq; agendo nihil agere; aut si quid agis, eos quos sic velis, si adeas, molestiâ & indignatione complere.

XXI. Hominum cum hominibus comparationes devita; idcoque si quis rei bene gestæ aut virtutis prædicatione laudatur, tu coram eo de eadem virtute alterum ne lauda. Omnis enim comparatio odiosa est.

XXII. No-

XXII. Novis de rebus dissipatos, sermones narrare alijs, facile animum ne inducas, nisi veros esse certâ authoritate cognôris. Nec cùm audita refers, authorem memores, quin gratum ei id fore jure existimes. Quod secreto audis, tecum habeto, atque alteri ne dixeris.

XXIII. Si quid narrabis, leges, ratione differes, longus ne esto, tum maximè, cùm aut res ipsa parvi momenti est, aut sentis eam parum auditoribus gratam esse.

XXIV. Noli esse in alienis rebus curiosus, & ubi, qui inter se conferunt, arcanò colloquuntur, eò ne accede.

XXV.

XXV. Quod efficere atque exequi non potes, in id operam tuam ne deferas; quod spoponderis verò, id serva atque præsta.

XXVI. Quæ legatio obeunda tibi erit, quæ relatio, quæ authoritas, eâ fac tranquillè prudenterque defungâre, sive illa tibi ad plebejos homines sive ad optimates sustinenda erit.

XXVII. Interea, dum Præfides tui cum alio verba faciunt, cave aut fabuleris, aut rideas, aut aurem ijs, quæ inter eos dicuntur, admoveas.

XXVIII. Ne musles, ne gannias.

XXIX. Quod nescis certò, tanquam certum ne asseveres.

XXX. In-

XXX. Inter majores maxime-  
que eos, qui cum imperio tibi  
præfunt, non interrogatus ne  
elóquere. Eloquuturus confur-  
ge, ac nudato capite paucis re-  
sponde; nisi & sedendi & caput  
velandi potestas facta tibi fuerit.

XXXI. In concertationibus,  
maximè quæ in communi vita  
occurrunt, ne sis vincendi adeò  
cupidus, ut non alijs suas quoque  
dicendi partes liberas relinquo.  
Seu jure autem, seu injuriâ con-  
tendas, par est acquiescere te au-  
thoritati aut pluriũ, aut conten-  
tiosiorum. multoque magis eo-  
rum, qui vel tibi vel disputationi  
præfident.

XXXII. Lacesfitus verbo, vel  
injurio-

injuriôsè appellatus, neque respondes, neque te defendas; magis rem joco elude, aut tanquam ea te modicè tangat, ita te ostende; esto, multi ad jus tuum defendendum te vocent; certus, *non omni dicto responso opus esse.*

XXXIII. Non cujus sermoni pugnaciter resistas, contentiosè ista opponens, *Non sic res habet, ita habet, uti sentio dicoq.* Alieno judicio sta; ijs potissimum de rebus, quæ sint an non sint, haud magni interest.

XXXIV. In communi etiam tuorum æqualium, congressione nè blatera ut planus & circulator, sed loquere modicè & opportunè, quam diu se aliquid dat, quod



quod tum sit ad rem, qua de agitur, tum certum tibi atque exploratum. Nam de re, quam non teneas, sermonem inceptare, eo-  
que ostenso & incepto excusare caducam rei memoriam, quam tu legisset tamen certò scias, frigida & inveniisti exempli excusatio est.

XXXV. Te addecet compositum honestâ gravitate, quid alij dicant, animum attendere, subinde ne ista turpiter quærites, *Ecquidnam dicis? quæ gesta, inquis, res est? fugerunt me quæ dixisti, aliâve id genus ineptias inculces.*

XXXVI. Si quid narrare ceperit quispiam, non obtundas  
narranti

narranti, id jam te scire: ei rem  
 nō apprimè rectissimè narranti,  
 né abnutes, neu contrà nictes,  
 aut risu illudas. Multò minus di-  
 ci æquum est. *Non sic res habet:  
 falleris.*

XXXVII. Vocem nec con-  
 tende ut præco; nec tam demit-  
 te, ut quoad par est, nec exaudia-  
 ris.

XXXVIII. In deambulatio-  
 num congressionibus, ne temerè  
 ut freno socium inhibe, tertio  
 quoque verbo eum demorans.  
 Nec tam vicinum ei te applica,  
 ut cubito pulses; nec plus palmo  
 circiter ab eo te abjunge.

XXXIX. Annum in pangen-  
 dis procemijs, in excusationum  
 conqui-

conquisitarumque elegantiarum delicijs ne pone, quale exemplum. *Amabo, o colendum caput, ignosce si haud satis cultè, satis idonè rem dicturus sum: Obsequendi tibi studio plus etiam emitar, quàm efficere possim; aliique ejusdem modi odiosi & insipidi præfationum circumductus. Verùm quoad rectè fieri & commodè potest, à re ipsa ordire, exorsusque ingenuâ animi æquitate ac fiducia, imperturbato orationis tenore, sermonem contexe ad extremum. Id quod dum agis, ne longus esto, ne digredere frequenter, ne unum aliquem loquendi modum crebrò inculca.*

XL, Qui impeditiore est lingua

guâ, is ne ambiciosè semper loquatur, id operam det, ut quod linguæ deest, silentio & auditione suppleat.

## CAPUT VIII.

### *Decorum in mensa.*

#### DOCUMENTUM I.

**P**rimùm. Manus tibi lava munditer; tunc cum eo, qui mensæ benedicit, sacras preces respondendo recíproca. Si, qui mensæ bene precetur, alius non adest, tu ipse benedic: sed quod suprà dictum est, arrecto in pedes corpore, & capite aperto.

II. Mensæ accumbens, corpus ne scalpas: pari cura à spuatando,

tando, tussiendo, mungendo, tibi,  
quoad potes, tempera; si qua te  
horum necessitas, urgebit, aptè  
& decorè ei servias, tum quàm  
minimo strepitu, tum vultu  
non nihil subducto atque averso.

III. Ne ut lurco, ut helluo,  
sic edas.

IV. Panem partire, non ma-  
nu, sed cultro, nisi permodicus  
panis recensque sit, quem manu  
partiri, convivæ omnes aut ple-  
rique; instituant.

V. Non te immittas in men-  
sam ad cubitos usque, neque qua  
in sede resides, ei aut humeris aut  
brachijs ineptè incumbas.

VI. Fartim ne edas, expletis  
ambabus malis.

D

VII. Pa.

VII. Panem vino ne infut-  
ces, nisi aut summâ domi autho-  
ritate sis, aut valetudo tua rem  
excuset.

VIII. Neutiquam ostendas,  
aut dapes aut vinum egregiè pa-  
lato tuo arrisisse. Sed si domus ac  
mensæ moderator, de his aliquid  
te poscit, responde modestè &  
prudenter. Cave etiam atten-  
tius, ne cibos eleves, neu alios,  
plurèsvè in mensam inferri cu-  
res.

IX. Salem è salino carpturus,  
culter ne unctus sit, vide; cul-  
trum autem aut fuscinulam cum  
detergere opus erit, aut panis  
frustulo, ut alicubi usus est, aut,  
ut alibi, mantili aptè id fiet; cer-  
tè,

tè, non ad totum panem pingui affricu.

X. Si quem convivio excipis, ei te decet cibos honoris causa dispartiri ac porrigere, etiam illum liberaliter ijs impertiendo, qui coram eo sint. Sin te alius convivio excipit, præstat expectare te, dum epuli Dominus, aut ejus nomine alius quispiam tibi te participet, quàm tu tibi manu eos præsumas; nisi aut familiaris inter candidè amicos epulatio sit, aut qui epulum dat, ultro à convivis sibi & gratiæ apponi petat, omnes ut liberè, non expectatâ alienâ manu de mensa sumant, uti domi suæ suo arbitratu. Est & prudenter ac

modestè officiosi , domi alienæ ;  
ubi authoritate non valeas Chi-  
rónomi munus haud usurpare ;  
quod tamen non usurpes auda-  
cter, sed factites cum laude , ubi  
in frequenti convivis mensa , o-  
culus manúsve Domini impin-  
guare omnes non potest, ideoque  
partem curæ suæ, tacitè aut di-  
sertè, longo in convivarum or-  
dine illo, libens volénsque alijs  
transcribit.

XI. Cibos ne perfla, sed si ca-  
lidiores erunt, expecta, dum de-  
frigescant. Iusculum quidem  
temperari potest modestè, sen-  
sim cochleari illud commoven-  
do: at de scutula forbère illud ad  
mensam, vel combibere , non  
cochle-



cochleari sibi in os indere, inuentum est.

XII. Cibos ad mensam ne olfacito; & si quos fortè olfeceris, dehinc convivis cæteris ne apponito.

XIII. Panē, unctis digitis, adipato contactu ne perunge; eum secturus ante tibi manus deterge si unctæ erunt. Proinde cave, ne manus cōspurces, aut digitos perungas, & ubi cochlearis ac fusciculæ copia est, ijs ut decet, atq; bene educatorum mos est, utere.

XIV. Si panem carnēve in embamma intingis, quod præmorderis, ne iterum intinge; moderatum frustum sit, quod in singulos intinctus condimento

D. 2 imbu-

imbuis, quodque unâ buccâ  
conficitorum queat.

XV. Non sunt deiicienda sub  
mensam, non iactanda in terram  
ossa, putamina, vinum, alia ge-  
neris ejusdem. Excipiuntur, quæ  
mansu dura ac nauseosa despue-  
re necessitas cogit; neque hæc  
talia tamen sine aliquo decoro  
ore ejectionantur. Sunt eorum ex-  
ceptores digiti duo, manusve si-  
nistra compressa belle ad excipi-  
endum simul ad occludendum-  
que. Quod si res liquida ac flu-  
ens erit, tum despuitur in terram  
liberius, sed, quod ante est anno-  
tatum, vultu, si integrum erit,  
subducto interim atque averso  
in latus.

XVI. Est

XVI. Est & decóri munditijs alienum, prunorum, ceraforum ossa durata, talémque reliquam aliunde materiem in patellam inspuere. Sinistrâ, quod proximè dictum est, ori adnotâ venustè primùm excipiantur, tum super quadrâ seorsum deponantur.

XVII. Ne rusticè cum cultro in manu, simul eâdem cibum tibi in osingere.

XVIII. Quæ alijs apposita sunt fercula, ea circum oculis ne perlustra. Dum bibis, dum te obescas, oculos ne sustolle.

XIX. Panem multum sectione unâ ne conscinde; ne confecta in crusta quadrâve grandes, sed in exiguas vel mediocres.

D 3

Eun-

Eundem æquabiliter subseca, ob-  
cāmque rem, neque ut fossis in-  
co lacunis, excava, neque ut ex-  
enterans, solam micam exime,  
aut solam crustam defringe, sed  
ambas unà succide. Neque au-  
tem panis buccas semper appo-  
sito orbe aut patella concide.

XX. Si, quòd dentibus es im-  
becillis, panis crustam manderere  
non potes, vel si ambusta illa aut  
prædura sit, tamen consultius vi-  
detur, crusta singula pro ut ea  
consecas, quàm totum solide pa-  
nem crustâ defectâ distringere.

XXI. Insulsa res est, in ossam,  
in pulpamenta, quasi arcuato in  
ea corpore, inclinatum propen-  
dere; sat est modestè, incumbere  
non-

nonnihil, dum jure aut aceto in-  
tincta buccæ è mensa in os car-  
pitur, ne liquente succo vestium  
sinus conspurcetur. Hac re pro-  
visâ, caput illico surrigendum  
est.

XXII. Sunt & suis temporum  
intervallis referendi inter men-  
sam à cibis, à patinis oculi; non  
tamen idcirco aut circumferen-  
di vagè, aut in convivas, in men-  
sæ ministros, in aliena fer-  
cula defigendi.

XXIII. Fœdum apprimè est,  
mappas dapali unguine inquinare;  
horridius etiam madentem  
sudore vultum, nasi proluviem,  
orbis, patinas, mantili detergè-  
re.

D S

XXIV.

XXIV. Quod delibâris , idem  
è manu seu vinum, seu quid aliud  
alteri ne porrige.

XXV. Manus dapum succo  
& liquamine perfusas pani ne  
affrices, toti præsertim & mole  
aliqua solidè integro, quòd si  
lautius perundæ erunt, possis ut  
quidem videtur, primùm ad pa-  
nis turundam, quam mox ori in-  
gesturus sis, eas defricare, tum  
mantili perinundare, quod ijs  
jam deterfis, minùs foedetur. Ac  
neceffe ut hoc fit, eveniet rariùs,  
si eleganti politorũ more coch-  
leari ac furcillâ ritè uteris. Dili-  
gentiùs etiam à lambendis digi-  
tis abstine, ac maximè sonoro-  
rum stlopiis eorum linctu.

XXVI.

XXVI. Cùm vesceris, cùm bibis, dentibus ne concrepa; sorbendo absurdè, mandendo clariùs, aut alio quovis modo.

XXVII. Ossa suctu avido, cum sono præsertim ne suge, ne exsucca; ne carpe utraq̃ue manu, sed sola una ac venustè, ne canū more arròde, sed manu una preheñsis ac fere digitis duobus, carnes cultello exime; medullam ne ad panem, ad lances incussis ijs ossibus excute; sed eam placidè cultro, si potes, exime. Omnino sapientibus non placet ossa manibus tractari, ac multò minus in os immitti.

XXVIII. Duriora quæ sunt, ut ossa carnium fructuūve,

cultro ne frange, ne disseca; ne dentibus, ne alia ope comminue sed intacta relinque.

XXIX. Communi è ferculo, quod socio obversum ac sub manum est, id ne usurpa; id sume, quod tibi adjacet, nec quàm alij luculentius. Ac si fructus erunt, si res consimiles, eas ad delectum curiosè ne attrecta. At enim quibus commune tecum ferculum est, ij quid sumant; ne attende.

XXX. Buccella buccellæ succedat, in stomachum jam traje-ctæ. Tales buccellæ sunt, quæ malas immodicè non inflent. Manu una cibum ori admove, ac ferè dextrâ.

XXXI. Scyphum pateramve,  
ne



ne sic vino coronā, ut in mensam exuberet.

XXXII. Dum in ore adhuc buccē est, ne bibe. Potum autem ne pōsce, ne loquere, ne vinum tibi infunde, ne bibe interea, dum bibit qui tibi affidet, aut qui in mensa summus omnium est.

XXXIII. Dum bibis, aliō ne transpice.

XXXIV. Ne per lentē bibito, ne præfestinē, ne ut vinum commanducans, ne frequentius, ne vinum meracum. Nam hæc talia potatorū sunt atque ebriosorum. Sub potum atque à potu labra tibi extergito, at neque à potu neque unquam aliàs, qua-

si animâ oppressa , densum & cum strepitu exspira. Est enim res factu quàm indecôra.

XXXV. Si quis pocula tibi miscet, scyphum solâ manu unâ sustine haustum eundem interruptè ne ébibe; nasum cyatho in amœnâ cupidine penitus ne immerge; totum quod infusum erit, si combibere unâ non potes, depone in haustum alterum, aut si quis ministrator à tergo adest, ei in manum transde. Quare interest, non plus tibi unâ infundi sinas, quàm quod semel possis perbibere; maxime si per mensæ morem tibi integrum non est scyphum cum eo quod superaverit, coram ad manum tibi aservare.

XXXVI

XXXVI. Dentes ne mappâ aut mantili, ne digito; cultro, furcillâ, ne quod putidissimum est, vnguibus perpurga; sed dentiscalpio. At mensa in ipsa dentes tibi scalpere, si alij id non faciunt aut si eleganter instituti in more non habent, haudquam convenit.

XXXVII. Vino os ne collue, quod mox propalam despucendo ejectes, verum mensâ solutus; manus cum cæteris lavare unâ assuesce. Certè palàm oscolluere, elegantia alienum videtur; Quare & cùm ad mensam polubro subjecto aqua manibus datur, solas lavare manus adde-  
cet.

Non

XXXVIII. Non est præstabile admodum, atque hodie obsoletum videtur, mensæ socios, crebrò præsertim atque importunè invitare, ut appositis epulis sese exhilarent. Nescio quo pacto enim, epulandi libertas dum fieri eis videtur, magis tollitur. Minus te condecet, quoties bibas alijs propinare, quòd si te alij poculis invitant, potes modestè rem deprecari, gratiam habendo, tèque victum atque imparè confitendo, aut verò referendæ gratiæ, vinum libare tantum; præcipuè ubi præbendi gratiofus mos est, & nisi par gratia redhibetur, offensio nascitur.

Digres-

XXXIX. Digressus è mensa,  
dentiscalpium neque ore conti-  
ne, neque auri crede, utroque in-  
concinniùs facit, qui collo ap-  
pensum gerit.

XL. Statim à mensa ne ob-  
dormiscas: magis potu ac cibo  
ita te refice, necesse ut non sit,  
curam indè omnem, seriam etiā  
& gravem intermittere.

XLI. Juvat, quicumque cibus  
appositus sit, de eo reliqui sem-  
per aliquid in patella relinquare;  
obsoniorum in primis, quæ ma-  
jore copia illata fuerint. Ne alia  
quidem tam peredenda sunt, ut  
pane pátina, aut cochleari scu-  
tella, immundâ perediâ deter-  
geatur converraturque quippe  
gulæ

gule & voracitatis signa sunt ista. Contra, convenit inquam residui superesse aliquid, estque res commendabilis, magna in ciborum varietate, non qui delicatissimus fit, eum invadere, sed vulgarioribus contentum esse.

XLII. Simul alij edendi finem fecerint, fac & tu tibi modum, neque tum verò laxis brachijs mensæ incumbe, sed solis manibus extremam contingito.

XLIII. Haud convenit cibum cum cibo commiscere, multoque minùs incoctas herbas aut esculentum aliud de scutella, eximere, quo super quadram aut in catino frigescant, vel tu tibi scorsum ijs vescaris.

Nimi-

Nimirum isthæc nauseam cernentibus inducunt.

XLIV. Tum inter epulas ijs remotis, mantile, quadram, panem, cultellum, sic dispositè in rem aptabis, ut convivæ aut plures, aut principes exemplo erunt; nec, quod domi soles, alieno in convictu nini opere retinebis. Appâret inolevisse jam morem, cum mensa removenda est, panem, cultellum, fuscinulam, super orbem quadræmve statuendi, mantili desuper injecto.

XLV. Est principis in mensa, atque in summo accumbentis, mantile primò explicare, primò in mensam manum porrigere; cætero-

cæterorum ; expectare quietè dum inceptet, nec manum antè quoquam admove.

XLVI. Vicissim est ejus qui præsidet ; tempestivè occipere, providere attentè omnibus, convivas sermonibus mulcère, mensam claudere, sed tam intra modum, ut lentissimo cuiq; suum sit vescendi omne tempus. Teneat se interim, si opus erit, escis leviter degustandis, aut ubi colloquendi est usus, conferendis amœnis sermonibus, usque dum omnibus sit exempta fames atq; edendi cupid.

XLVII. Quicquid epulis intervenerit, nihil irascere; ira incitatus, tamen eam comprime,

ut



ut ne se efferat; nominatim si extranei tecum accumbunt.

XLVIII. Ne accumbas in loco principe; sed si is te decet, aut qui domi princeps est, ita omnino vult, ne tantopere obnitere, toti ut coetui molestus sis.

XLIX. Inter mensam; si lectio, si sermocinatio erit, fac attentus sis; ac si tibi loquendum fuerit, vide ore vacuo ut id facias.

## CAPVT IX.

### *Ministerium mensæ.*

#### DOCUMENTUM I.

**P**OSTEAQUAM lavandis manibus aquam affuderis, scito tibi

bi dictam esse legem, deinceps  
dum mensæ ministras, caput  
non scalpendi, non excreandi,  
quoad tu quidem abstinere po-  
tes, non tussiendi, manusque &  
mundas, & exertas præferendi.

II. Ubicunque aut sternútas  
aut despuis, averte te in latus; ne  
aut glutias autem, aut in ore as-  
ferves, quod exspui opus est.

III. Dapes inferens aut effe-  
rens è mensa, caue cui piam po-  
tanti imprimis aut brachium  
contingas aut humeros impel-  
las. Cautius etiam id vide, ne cui  
vestes commacules. Quanquam  
autem diligenter circumspicere  
te oportet, ne quid convivis de-  
fit, aut num quis eorum signo te  
aliquid

aliquid moneat, non debes tamen oculis in eorum vultu habitare, perinde ut si, quid edant, numero adnotes.

IV. Cùm poscentibus, aut pocula in manum offeres, aut aquam miscebis, præsertim præstabili dignitate cuiquã, testare honorem, quoties id feceris, mox, ut biberit, cyathum aquâ collue.

V. Cùm panem mensæ supplêbis, ne manu eum comporces, sed mensario orbi impositû, & terso, & ne panis subsulter, etiam æquabili; tum astitue convivis loco idoneo.

VI. Lances scutulâsve plures duabus, suam quaque manu,  
unâ

unâ ne importes, ac si calebunt plus æquo, lancem alteram orbemve eis supponito. Defer autem recto libratas æqua mento, ut ne quâ invergas effundâsve. Patinam, dum de ea cibus adhuc sumitur, à vescentis oculis ne remoue; expecta, dum à se eam removeat, aut eam ut tollas, tibi innuat.

VII. Salinum, primum ad mensam statui, extremum tolli, usus ferè obtinet.

VIII. Scyphos relaturus plures quàm duos trêsvè unâ operâ ne effer; digitos intrò ne immitte, sed pede ab imo eos carpe.

IX. Ne cirneas, ne ampullas ad mensam vitreas, maximè si  
vino

vinò fervient, ad summum imple, ne vinum effundatur.

X. In eximendis patinis, ne montis instar alias alijs impòne, nominatim si penitus deplètæ non sunt. Multò insuavius est, in convivarum oculis alias in alias deplère; Nauseosum quippe & stomachosum est; sed ut sedant in mensa, ita eas exporta.

XI. Remotis epulis; capaci in lance, aut eleganti & splendido in canistro analecta colliguntur mūditię causa. Salino seorsim dempto, cultris, cochlearibus; fuscinulis super orbe compositis, atque in canistrum immissis, mappa denique convolutis unà panis fragmentis; si jam exempta non erunt, colligitur.

E

XII. Cu-

XII. Curantur &, cùm sic  
 usus est, nitida in lance dentiscal-  
 pia, denique laxo linteo; desu-  
 pérq; polubro mensa sternitur,  
 aqua manibús datur, primúm-  
 que ex ordine ei, qui cæteris an-  
 testat; mantile adijcitur, unum  
 ei, qui præest<sup>o</sup> omnibus, si unus  
 erit, atque ei proprium; cæteris  
 ab eo suum in commune alterũ,  
 polubrum ad eos adducendo, sic,  
 ut duo tréve conjunctim unà  
 manus applicare ad id possint.

XIII. A mensa, aut ministe-  
 rio mensæ, est ingenuè ac nobi-  
 liter instituti, honorem habere,  
 convivis, pileo sibi detracto, aut  
 qua optima ratione aliâ, pro in-  
 genio gentis, aut loci usu.

CA-

## CAPVT X.

*Nocturnus decubitus.*

## DOCUMENTUM. I.

**F**Ac in tempore lectum in-  
cas; enimverò non nisi Deum  
sincerâ fide ac pietate antè vene-  
ratus, transactæ diei ratione re-  
cumpositâ susceptâque melioris  
vitæ voluntate.

II. Vestibus ante aliorum  
ora ne te spolies. Has sic com-  
pone unâ, ut omnes postridie  
manè tibi ad manum sint, quin  
inspice eas aliquando, atque in-  
quire in eas, utque opus erit, aut  
succussando aut scopulis depur-  
gando, eas permunda.

E 2

III. Sic

III. Sic decumbe, ut compositus modeste atque undique opertus jaceas. Non dormias supinus pronusve, sed alterutrum in latus.

IV. Dormi & indusiatus semper, hoc enim & pudor exigit, & lex decori, & casus incerti, ad quos, si qui ingruent, expeditior sis eris.

V. Vbi diluxerit, non desideas in lecto, neque restites, sed surge impigre, vestes indue, atque à cubili ocys exscende.

---

**H**ucusque super *Urbanitate* sua, ac Christiana Morum Temperantia Astiologus; quæ



quæ ut Principis more , nunquam sola per forum ambulat, ita in suo maximè comitatu *Modestiam* secum & *Verecundiã* circumducit , nobile sororum par, ac vel sua indole dignum, cui omnis Adolescentia in occursum erumpat. Et gratulari sibi herclè Juventus potest , ad quam trium hic tam illustris Gratiarum chorus divertit. De quibus verò quid jam ab antiquo etiam , vel sanctior Patrum schola , vel ceterus eruditioris ævi Senatus, censuerit jusseritve, addam hîc, Lector, bonâ veniâ tuâ, & velut sacrum apud te Epimetrum deponam.

E ;

EST

**E**ST, si Theologum consulis  
*Modestia* hæc, &, si mavis  
*Verecundia*, velut quædam o-  
 mnis Decorî mater, quo sicut  
 Artifex decempedâ suâ terram,  
 ita omnes illa in Homine  
*Mores & Actus* metitur, ac ceu  
 in lineam *Honesti* vocat: ut  
 nec loqui adeò, nec gradi pos-  
 sis cum laude, nec quidvis a-  
 gere aliud, nisi *Modestie* ma-  
 gisterio; quæ si nescis, ex men-  
 tis, & affectuum quos vocant  
 tranquilla malacia, ceu pul-  
 chrum è flore germen pronasci-  
 tur.

*Super ea sic.*

*Ambrosius* 1. off. Cap. XLV.  
 Teneamus igitur *Verecun-  
 diam*,

*diam*, & eam, quæ totius vitæ ornatum attollit, *Modestiam*. Non enim mediocre est, rebus omnibus servare atque impartiri ordinem, in quo verè præluet illud, quod *decorum* dicitur, quod ita cum honesto jungitur, ut separari non queat.

*Cap. XLVII.*

Si quis igitur æquabilitatem universæ vitæ, & singularum actionum modos servet, ordinem quoque & constantiam dictorum atque operum, moderationemque custodiat; in ejus vita *decorum* illud excellit, & quasi in quodam speculo elucet. Accedat tamen suavis

sermo, ut conciliet sibi affectum audientium, gratumque se vel familiaribus, vel, si fieri potest, omnibus præbeat, neque adulantem se, neque adulandum cuiquam exhibeat. Non despiciat, quid de se unusquisque, & maximè vir optimus sentiat. Hoc enim modo deficit bonis deferre reverentiam.

*Hujus ejusdem virtutis actus & officia pulchrè describit S. Ephrem. lib. de virt. & vitijs cap. de temperantia: Temperantia, Modestia freno linguam temperat à convitijs, & execrationibus abstinet, non delectatur vaniloquio, unum in alterum, calumniando & obtre-*  
*lando,*

stando, non commovet, secreta celat, & silentio aliena conterit. In gloria *Modestia* cernitur, quando quis ita mentem moderatur, ut nec honoribus, nec dignitatibus, nec laudibus aucupandis vincatur. In cogitationibus cùm quis timore Dei, blandas ardentèsque cogitationes reprimat. In cibis, quando nec delicatioribus quis delectatur, ne extra præfinitum edendi tempus cibum appetit, horamque anticipat; nec dapum varietatem & pulchritudinem avidè requirit. In potu, quando non immodicè, non solum vino, sed nec aquæ quidem potu fruitur.

E s

*Iterum*

*Iterum Ambrosius Cap. XIX.*

Delectavit me diutius in partibus demorari *Verecundia*, quia ad vos loquebar, qui aut bona ejus ex vobis recognoscitis, aut damna ignoratis. Quæ cum sit omnibus ætatibus, personis, temporibus, & locis apta; tamen adolescentes juvenilesque annos maximè decet. In omni autem servandum ætate, ut deceat quod agas, & conveniat, & quadret sibi ordo vitæ suæ.

*Verecundia* in ipso quoque corporis decore eminet, ita tamen, ut etiam ipse non sit affectatus decor corporis, sed naturalis, simplex, neglectus  
magis

magis quàm expetitus , non  
 preciosis & albertibus adjutus  
 vestimentis , sed communibus,  
 ut honestati vel necessitati nihil  
 desit , nihil accedat nitori. Vox  
 ipsa non remissa , nihil foemi-  
 neum sonans , qualem multi  
 gravitatis specie simulare con-  
 sueverunt , sed formulam quan-  
 dam ac succum virilem refer-  
 vans.

*Hoc est pulchritudinem vi-*  
 vendi tenere , convenientia  
 cuique sexui & personæ red-  
 dere. Hic ordo gestorum op-  
 timus , hic ornatus ad omnem  
 actionem accommodus. Sed  
 ut molliculum & infractum ,  
 aut vocis sonum , aut gestum

corporis non probo, ita neque  
agrestem & rusticum. Natu-  
ram imitemur. Ejus effigies,  
formata disciplinæ, forma ho-  
nestatis est.

*Et mox. Cap. XX.*

Habet sane suos scopulos  
*Verecundia*, non quos ipsa in-  
vehit, sed quos sæpe incurrit.  
Si intemperantium incidamus  
confortia, qui sub specie jucun-  
ditatis venenum infundunt bo-  
nis: Hi si assidui sunt, & ma-  
ximè in convivio, ludo, ac  
joco, enervant gravitatem il-  
lam virilem.

Caveamus itaque, ne dum  
relaxare animum volumus, sol-  
vamus



namus omnem harmoniam,  
quasi concentum quendam bo-  
norum operum. Usus enim ci-  
to inflectit naturam.

*Accuratus adhuc. Cap. XIIIX.  
Supradicto.*

Pulchra virtus *Verecundia*,  
& suavis gratia, quæ non so-  
lùm in factis, sed etiam in ipsis  
spectatur sermonibus ne mo-  
dum progrediaris loquendi, ne  
quid indecorum sermo resonet  
tuus. Speculum enim mentis,  
plerumque in verbis refulget.  
Ipsam vocis sonum libret *Mo-  
destia*, nè cuiusquam offendat  
aurem vox fortior. Denique  
in ipso cavendi genere, prima  
disci-

disciplina *Verecundia* est, imò etiam in omni usu loquendi, ut sensim quis aut psallere, aut canere, aut postremò loqui incipiat, ut verecunda principia commendent incessum. Silentium quoque ipsum, in quo est reliquarum virtutum ocium, maximus actus *Verecundie* est.

Est etiam in ipso motu, gestu, incessu tenenda *Verecundia*. *Habitus* enim mentis, in corporis statu cernitur. Et vox quædam animi est, corporis motus. Meministis filij; quendam amicum, cum sedulis se videretur commendare officijs, hoc solo tamen in Clerum à me non receptum, quòd gestus ejus pluri-

plurimum dedeceret. Alterum quoque, cum in Clero reperissem, jubere me, ne unquam præiret mihi, quia quodam insolentis incessus verbere, oculos feriret meos. Nec fefellit sententia. Uterque enim ab Ecclesia recessit, ut qualis incessu prodebatur, talis perfidia animi demonstraretur. Lucebat in illorum incessu, imago levitatis.

*Sunt etiam* qui sensim ambulando, imitantur histrionicos gestus, & quasi quædam fercula pomparum, & statuarum motus nutantium, ut quotiescunque gradum transferunt, modulos quosdam servare videantur.

*Nec*

*Nec cursum* ambulare honestum arbitror, nisi cum causa exigit al cuius periculi, vel iusta necessitas.

*Est gressus* probabilis, in quo sit species auctoritatis, gravitatisque pondus, tranquillitatis vestigium. Ita si studium desit atque affectio: sed motus sit purus ac simplex. Nihil enim fucatum placet, motum natura informet. Si quid in natura vitij est; industria emendet: ut ars desit; non desit correctio.

*Quod si etiam* ista spectantur altius, quanto magis cavendum est, ne quid turpe exeat. Hoc enim graviter coinquinat hominem.

minem. Non enim cibus inquinat hominem, sed injusta obrectatio, sed verborum obscœnitas. Hæc etiam vulgo pudori sunt. In nostro verò officio, nullum verbum, quod inhonestè cadat, non incutit *verecundiam*. Et non solum nihil ipsi *indecorum* loqui, sed ne aurem quidem debemus hujusmodi præbere dictis; sicut Joseph, ne incongrua suæ audiret *Verecundiæ*, veste fugit relictæ: quoniam quem delectat audire, alterum loqui provocat.

*Similia D. Gregorius in Pastoral.*

Intus est custodia, quæ com-  
po-

posita servat exterius membra,  
qui ergo statum mentis prodi-  
dit, foris in inconstantiam mo-  
tionis fluit, atque exteriori mo-  
tu indicat, quod nulla interius  
radix subsistat.

*Ex Deum ardore fuitur Cane  
form. 86.*

Quid amabilius Verecundo  
adolescente? quàm pulchra, &  
quàm splendida gemma, est  
*Morum Verecundia* in vita &  
vultu adolescētis? quàm vera, &  
minimè dubia bonæ spei nun-  
tia, bonæ indolis index? Vir-  
ga disciplinæ, expunctrix ma-  
lorum, propugnatrix puritatis  
innatæ, specialis gloria consci-  
entiæ, famæ custos, vitæ de-  
cus

cus, virtutis sedes, virtutum  
 primitiæ, naturæ laus, & in-  
 signe totius honesti.

*Neq; aliter judicavit Tullius.*

Qui postquam i. *Rhet.* di-  
 xisset; *Modestia* est, per quam  
 pudor honestatis puram & sta-  
 bilem comparat authoritatem.  
 Officia ejusdem ingenioso cala-  
 mo sic descripsit. *Sic lib.*  
*i. off.* lenis minimèque pertinax.  
 Neque verò tanquam in posses-  
 sionem suam venerit, excludat  
 alios, sed cùm reliquis in rebus,  
 tum in sermone communi; vi-  
 cissitudine nonnunquam uten-  
 dum putet: ac videat inprimis  
 quibus de rebus loquatur: si se-  
 rijs, securitatem adhibeat. Si  
 jocosis,

jocosus, leporem. In primis provideat, ne sermo vitiū aliquod indicet inesse moribus; quod maxime tūc solet evenire, cū studio de absentib, detrahendi causa, aut per ridiculū, aut severè, aut maledicè, aut contumeliosè dicatur. Habentur autem plerumq; sermones aut de domesticis negotijs, aut de republica, aut de artium studijs, & doctrina. Danda igitur opera est, ut, etiam si aberrare ad alia cæperit, adhuc revocetur oratio. Sed quoniam in omni vita rectissimè præcipitur, ut perturbationes fugiamus, id est, motus animi nimios, rationi non obtemperantes: sic ejusmodi motibus sermo debet vaca-



## VITÆ COMMVNIS. PRO

vacare, ne aut ira existat, aut cupiditas aliqua, aut pigritia, aut ignavia, aut aliquid tale appareat. Maximèque curandum est, ut eos, quibuscum sermonem conferimus, & vereri, & diligere videamur.

*Seneca verò lib. de 4. Virt.*

*A verbis turpibus abstineto: quia licentia eorum imprudentiam nutrit. Sermones utiles magis, quàm facetos & affabiles ama; rectos potius quàm obsecundantes: miscebis interdum serijs jocos, sed temperatos & sine detrimento dignationis & Verecundiae. Nam reprehensibilis risus est, si immoderatus. Si pueriliter effusus, si muliebriter fractus*

Ætus. Odibilem hominem facit risus, aut superbus aut elatus, aut malignus, furtivus, aut alienis malis evocatus. Si ergo tempus jocos exigit, hoc cum dignitate sapientiæ gere: non erit tibi sterilis, sed grata *urbanitas*. *Urbanitas* tua sine dente sit. Joci tui sine vilitate, risus sine cachinno, vox sine clamore, incessus sine tumultu, quies tibi non desidia erit.

*Idem in eodem.*

Non sis aliorum curiosus scrutator, neq; acerbus reprehensor, sed sine exprobratione corrector, ita ut admonitionem hilaritate prævenias, & errori facile veniam dato, nec extollas quemquam, nec deicias: requirenti facile respon-

## VITÆ COMMVNIS. III

responde, contendenti facile cede, nec in iurgia execrationesve discedas.

*Idem in eodem.*

Rari sermonis sis ipse, sed loquentium p̄tiens: severus ac serius, sed hilaris, non asperans.

*Valerius Maximus. lib. 4. cap. 5.*

*Verecundia* parens est omnis honesti consilij, tutela solemnium officiorum, magistra Innocentie chara proximis, accepta alienis, omni loco, omni tempore, favorem præ se ferens vultum.

*Ad hanc virtutem cœlitus impetrandā sequenti Deum formula implora.* Domine Jesu Christe, cui tanta, dum viveres, inerat *Modestiae* pulchritudo, ut Apostolus, 2. Cor.

Cor: 10. per *Modestiam* tuam ac  
*Mansuetudinem* ad virtutem nos  
hortatus sit, quæso te, Voces, Mo-  
tus, & gestus nostros universos,  
sanctæ *Moderationis* hujus virtu-  
te exorna; & ab eis, quicquid mi-  
nus est decens, clementer remo-  
ve; ut in his externis indicijs,  
Munditia hominis interioris e-  
luceat, & dū interiūs exteriūsque  
benè sancteq; cōpositi esse admi-  
timur, has dignissimas laudes in  
cordibus nobiscum conversanti-  
um accendere valeamus & con-  
servare, Amen.

Καριπὸς δὲ ἀγαθὸς ἐστὶν εὐτακτὸς  
βίος.


*Fructus autē Bonus est, Bene Composita Vita.*


F I N I S.

*Menda sic emenda.*

Prolog. in med. amissi. Fol. 3. lin. ult. lege  
dehinc. f. 7. lin. 13. 1. vlam. f. 10 lin. ult 1. Mo-  
um. fol. 13. lin. 16. lege Venuustum.







22  
A 9

BIBL  
VIT

X